

आकाशवाणी जयपुर-अजमेर  
प्रादेशिक समाचार

दिनांक 14.06.2024

समय: 18.45 बजे

00000

- प्रधानमंत्री नरेन्द्र मोदी जी-7 शिखर सम्मेलन मांय सिरकत करण सारु इटली पूग्या-केई देशां रा मुखियां सागे मीटिंग कीनी।
- उपराष्ट्रपति जगदीप धनखड़ जैसलमेर मांय बीएसएफ रा प्रहरी सम्मेलन ने सम्बोधित कीना।
- प्रदेश मांय रक्तदाता दिवस रे मौके जागरूकता कार्यक्रम राख्यी ज्या।
- राज्य मांय कठे-कठे आंधी-बारिश-उतराद हलकां मांय लू अर जोरदार गर्मी रो असर।

0000

प्रधानमंत्री नरेन्द्र मोदी आज जी-7 शिखर सम्मेलन मांय सिरकत करण सारु इटली रा अपुलिया पूग ग्या। प्रधानमंत्री केई देशां रा मुखियां सागे मीटिंग कीनी। वे आज दोपहरां फ्रांस रा राष्ट्रपति इमैनुएल मैक्रों सागे मुलाकात कीनी। दोन्यू नेता रक्षा, परमाणु, अंतरिक्ष, शिक्षा, जलवायु, डिजिटल सार्वजनिक बुनियादी ढांचा, खास प्रौद्योगिकियां, कनेक्टिविटी अर संस्कृति रा हलकां मांय भागीदारी और मजबूत बणावण रा बारा मांय चर्चा कीनी। प्रधानमंत्री मोदी ब्रिटेन रा प्रधानमंत्री ऋषि सुनक सागे ई मुलाकात कीनी। वे सोशल मीडिया पोस्ट रे जरिये राष्ट्रीय जनतांत्रिक गठबंधन सरकार रा तीजा कार्यकाल मांय भारत अर ब्रिटेन बीच रणनीतिक साझेदारी और मजबूत करण रा बारा मांय प्रतिबद्धता दोहरायी। प्रधानमंत्री मोदी कह्यो के दोन्यू देशां बीच सेमीकंडक्टर प्रौद्योगिकी अर कारोबार रा हलका मांय रिश्ता मजबूत करण री घणी संभावना है। प्रधानमंत्री मोदी यूक्रेन रा राष्ट्रपति ब्लादिमीर जेलेन्स्की सागे ई मुलाकात कर र दोन्यू देशां बीच रिश्ता अर यूक्रेन रा हालात माथे चर्चा कीनी।

000

उपराष्ट्रपति जगदीप धनखड़ कह्यो है के बी.एस.एफ हर पल वां रा ध्येय, **जीवन पर्यन्त कर्तव्य** ने सांचो करे है। वे आज जैसलमेर मांय बी.एस.एफ री 154 वीं बटालियन रा प्रहरी सम्मेलन मांय बोल रह्या हा। उपराष्ट्रपति कह्यो के बीएसएफ रा जवान मुश्किल हालात मांय ई पूरी तरह मुस्तैद रहेवे है, जो बेमिसाल है। ई मौके वे जवानां ऊं बातचीत कीनी अर वां सागे पौधा रोप्या। उपराष्ट्रपति प्रदेश रा दो दिन रा दौरा सारु पधार्या है। आज वां रा दौरा रो दूजो दिन हो।

000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं कानूनां रा बारा मांय जाणकारी देवण सारु आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला चलायी जा रही है। आज पेश है तीन नुवा कानूनां मांय गांवाई हलकां ऊं जुड़ी जाणकारी। भारतीय न्याय संहिता 2023 री धारा 146 गैर कानूनी अनिवार्य श्रम ऊं जुड़ी है। धारा 291 ढांढा-ढोरां ऊं जुड़्या लापरवाही रा बर्ताव

रा बारा मांय है। चोरी ऊं जुड़ी धारा 303, झपटमारी ऊं जुड़ी धारा 304 अर धारा 325 मांय ढांढां ने मार र या अपंग कर र नुकसाण करण ऊं जुड़्या प्रावधान है। धारा 326 मांय चोट, बाढ, आग या विस्फोटक पदार्थ ऊं शरारत करणो, जिण मांय खेती-बाड़ी रा मकसद ऊं पाणी री पूर्ति या मिनखां सारु खावण या पीवण सारु या जानवरं सारु पाणी री पूर्ति कम करण सरीखा कामां ऊं जुड़्या प्रावधान है। ई रे अलावा भारतीय नागरिक सुरक्षा संहिता 2023 री धारा 34 रे मुजब किण ई गांव मांय नियुक्त अहलकार करीबी मजिस्ट्रेट या पुलिस स्टेशन रा प्रभारी अधिकारी ने गांव री जानकारी देवण सारु जिम्मेदार है। धारा 164, 165, अर 166 – जमीं या पाणी सरीखी अचल सम्पत्ति ऊं जुड़्या झगड़ां रा मामलां रा निपटारा ऊं जुड़ी प्रक्रिया रा प्रावधान है।

0000

हज़ रो पांच दिन रो मुकद्दस सफ़र आज सरु व्हे ग्यो। इण मांय दुनिया भर ऊं करीब 20 लाख जणां सऊदी अरब रा मीना शहर पूग्या है। ई दफ़ा भारत ऊं पौने दो लाख ऊं बत्ता लोग हज करण सारु जा रह्या है। आं मांय ऊं एक लाख 40 हजार जणां हज कमेटी ऑफ़ इंडिया रे जरिए वठे पूग ग्या है। ई साल भारत ऊं सब ऊं बत्ती पांच हजार महिला हज़यात्री मेहरम या बिना पुरुष अभिभावक रे हज़ कर रही है। हज़ यात्री मीना मांय भेळा व्हेवण सारु पाक शहर मक्का ऊं सफर सरु कीनो। काल ऐ हज़यात्री अराफात रा मैदान मांय खास नमाज अदा करेला।

0000

मुंबई अंतर्राष्ट्रीय फिल्म महोत्सव ई महीना री 15 ऊं 21 तारीख ताई चेन्नई मांय राख्यो जावेला। इण रो खास मकसद सिनेमा प्रेमियां ताई बेहतर सिनेमा री पहुंच बधावणो है। राष्ट्रीय फिल्म विकास निगम री क्षेत्रीय प्रमुख रोहिणी गोवथामन आकाशवाणी सागे बातचीत करता थकां कह्यो के ओ कार्यक्रम पहली दफ़ा चेन्नई, कोलकाता, दिल्ली अर पुणे मांय राख्यो जावेला। इण रा पैला दिन चार्ली हेमिल्टन जेम्स री **बिली एंड मोली— एन ऑटर लव स्टोरी** फिल्म बतायी जावेला। 18 जून ने रेड कार्पेट कार्यक्रम राख्यो जावेला, जिण मांय थिएटर रा नामी कलाकार सिरकत करेला।

00000

देवनारायण बोर्ड रा नुवा अध्यक्ष ओम प्रकाश भडाणा आज जयपुर मांय बोर्ड रा दफ़तर मांय कामकाज संभाळ लीनो। ई मौके भडाणा कह्यो के वे देवनारायण बोर्ड रे मार्फत सामाजिक न्याय अर अधिकारिता विभाग कानी ऊं चलायी जा रही योजनवां रो फायदो हर पात्र जणा ताई पूगावण री कोशिश करेला। वे कह्यो के बोर्ड कानी ऊं चलाया जा रह्या छात्रावासां अर स्कूलां मांय बेहतर व्यवस्था तय करी जावेला।

000000

अन्तर्राष्ट्रीय रक्तदाता दिवस रे मौके आज प्रदेश मांय न्यारा-न्यारा कार्यक्रम राख्यी ज्या। बूंदी मांय खूनदान शिविर लगायी ज्यो। जिला कलेक्टर अक्षय गोदारा अर एस.पी. हनुमान प्रसाद मीणा खूनदान करण वाळां ने मान पाना दे र नवाज़ा। झालावाड़ जिला मांय खूनदान शिविर अर संगोष्ठी रे जरिये खूनदान करण रा बारा मांय जाग जगायी ज्यी। जिला रा झालरापाटन मांय एक सामाजिक संगठन री ओर ऊं लगायी ज्या खूनदान शिविर मांय डेढ़ सौ यूनिट ऊं बत्तो खून भेळो करी ज्यो। बांसवाड़ा मांय सरकारी कर्मचारी खूनदान कीनो। बाड़मेर री जालीपा फौजी छावनी मांय लगायी ज्या शिविर मांय फौज रा अहलकार अर जवान खूनदान कीनो। कोटा मांय सांसद ओम बिरला खूनदान रथ ने हरी झंडी बता र रवाना कीनो। वे खूनदान ने महादान बताता थकां सगळा ऊं खूनदान करण

री अपील कीनी। श्रीगंगानगर रा सरकारी अस्पताल मांय राख्थी ज्या खूनदान शिविर मांय 50 यूनिट ऊं बत्तो खून भेळो करी ज्यो।

0000

प्रदेश मांय योग रा प्रति जाग जगावण अर 10वां अन्तरराष्ट्रीय योग दिवस रा सिलसिला मांय न्यारा-न्यारा कार्यक्रम राख्था जा रह्या है। जयपुर ग्रेटर नगर निगम री महापौर डॉ. सौम्या गुर्जर री पहल परां जयपुर योग महोत्सव 2024 रा तहत आज चित्रकूट स्टेडियम मांय योग शिविर राख्थी ज्यो। कैबिनेट मंत्री राज्यवर्धन सिंह राठौड़ ई इण मांय शिरकत कीनी अर योगाभ्यास कीनो। महोत्सव रा तहत 16 अर 17 जून ने लगातार 24 घंटा सूर्य नमस्कार समेत न्यारा-न्यारा योगासन रो दरसाव कर्यो जावेला। केन्द्रीय संचार ब्यूरो री ओर ऊं जयपुर मांय जल महल री पाल माथे भारतीय वायु सेना, केंद्रीय रिजर्व पुलिस बल अर केंद्रीय औद्योगिक सुरक्षा बल रा अहलकारां अर जवानां सारू खास जागरुकता अर योगाभ्यास कार्यक्रम राख्थी ज्यो, जिण मांय आं बलां रा 180 अहलकार अर जवान सामान्य योग प्रोटोकॉल रो अभ्यास कीनो। ई मौके केंद्रीय संचार ब्यूरो रा कलाकार योग रा बारा मांय एक गीत पेश कीनो। कार्यक्रम रे दौरान राष्ट्रीय आयुर्वेद संस्थान, जयपुर रा सहायक आचार्य डॉ. पुनीत चतुर्वेदी री अगुवाई मांय संस्थान री टीम री ओर ऊं योग आसनां अर क्रियावां रो दरसाव करी ज्यो। कार्यक्रम मांय हाई बीपी अर मिर्गी रा मरीजां ने कपाल भाति रो अभ्यास सावधानी ऊं करण री राय दीरीजी। डॉ. चतुर्वेदी एसिडिटी री बीमारी दूर करण सारू शीतली अर शीतकारी, तनाव अर नींद नी आवण री बीमारी दूर करण सारू भ्रामरी अर कमर रो दर्द दूर करण सारू भुजंगासन, शलभासन अर दूजा आसनां रो अभ्यास करायो। सवाईमाधोपुर मांय केंद्रीय संचार ब्यूरो रा क्षेत्रीय कार्यालय री ओर ऊं आज खाट खुर्द रा सरकारी स्कूल मांय योगाभ्यास सत्र राख्थी ज्यो। कार्यक्रम रे दौरान ब्यूरो री ओर ऊं योग रा बारा मांय मौखिक प्रश्नोत्तरी होड़ राख्थी ज्यी अर जीतण वाळां ने ब्यूरो री ओर ऊं ईनाम दे र नवाजी ज्या। कार्यक्रम मांय मौजूद जनता ने रोजीना योगासन करण रो संकल्प ई दिरायी ज्यो। पाली मांय योग दिवस री तैयारियां रा बारा मांय अतिरिक्त जिला कलेक्टर री सदरत मांय अहलकारां री मीटिंग राख्थी ज्यी। बाड़मेर मांय बीएसएफ री 13वीं वाहिनी री ओर ऊं योग रा बारा मांय जाग जगावण सारू साइकिल रैली निकाली ज्यी।

0000

प्रदेश मांय आज ई कठे-कठे आंधी चालण अर बिरखा व्हेवण रा समाचार है। जयपुर मांय संवारे थोड़ी धूळ रही पण ई पाछे आखा दिन तेज तावड़ो पड्यो। म्हाणा भरतपुर खबरनवीस बतायो के वठे दोपहरां री बगत बिरखा व्हेवण ऊं गर्मी ऊं थोड़ी साता मिली।

.....

कोटपूतली, विराटनगर अर आरे-सारे रा हलकां मांय ई दोपरां री बगत आंधी चाल्यां पाछे छांटो-छिड़को व्हेवण ऊं पारो थोड़ो उतर्यो। **नीम का थाना मांय ई बिरखा व्ही।** दूजी कानी बूंदी मांय आखा दिन उन्ना बायरा ऊं परेशानी व्ही, हालांकि सिंज्या री पोर बादळा मंड जावण ऊं गर्मी रो असर थोड़ो कम पड्यो। मौसम विभाग आवता 24 घंटां मांय कोटा, उदयपुर, जोधपुर अर बीकानेर संभाग मांय कठे-कठे हल्की बिरखा रा आसार जताया है, जदके राज्य रा उतराद हलकां मांय कठे-कठे लू बाजण रा आसार है।

0000

राष्ट्रीय पल्स पोलियो अभियान रा तैत बूंदी ज़िला मांय 23 जून ने 5 साल तांई उम्र रा 1 लाख 87 हजार बच्चां ने पोलियो री बीमारी ऊं बचाव रा टीका री खुराक दी जावेला। ई सारू ज़िला मांय 749 बूथ बणायी ज्या है। बनाये गये हैं। पोलियो ऊं बचाव री दवाई री खुराक पावण सारू 2 हजार 996 खुराक पावण वाळा अर 151 सुपरवाईजर लगायी ज्या है। भरतपुर मांय ई जिला कलेक्टर 23 जून ने पोलियो बूथां माथे अर 24 अर 25 जून ने घर-घर जा र करीब 2 लाख 7 हजार बच्चां ने पोलियो ऊं बचाव री दवाई पावण रा हुकम दीना है।

0000